

LES ENTRETIENS
DV ROY,
A S. GERMAIN.

M. DC. XLIX.

LES ENTRETIENS
DU ROY.
A. S. GERMAIN.

M. DC. XLIX.



LES ENTRETIENS DV ROY, A S. GERMAIN.

Le Roy.

M On frere, ie suis bien aise que tu sois venu dans ma chambre, puisque ie pourray te dire avec plus de liberte mes sentimens.

Monsieur.

Mon petit papa, ie seray bien aise de les scauoir, puisque à vous & à moy on nous interdit de parler à personne, & que nous pouuons nous consoler tous deux, de ce qui nous arriue.

Le Roy.

Mais mon frere, prenons garde auant que de rien dire, si quelqu'un nous escoute; car ma bonne maman fait tousiours veiller sur nos discours.

Monsieur.

Ouy dea, voyons, afin que nous puissions parler en seureté.

B ij

Le Roy. Ne vois-tu personne?

Monsieur. Non.

Le Roy. Vien donc t'asseoir aupres de moy, & nous dirons ce que nous sçauons. Dy moy, ne sçais tu point pourquoy nous demeurons tant icy, pour moy ie commence de m'y bien ennuier, car ie ne sçay ce que i'y fais?

Monsieur. Ie m'y ennuie bien auffi & le temps me dure bien de retourner à Paris, où ie me plais mieux qu'icy.

Le Roy. Mais dy donc, ne sçay tu pas pourquoy nous demeurons tant icy?

Monsieur. Ie vous le diray bien, mon petit papa; mais ne dittes donc pas que c'est moy qui vous l'ay dit, car si ma bonne maman le sçauoit, ie serois bien fustigé, & vous vous estes à cette heure exempt du foüet.

Le Roy. Non, non, dy seulement, ie te promets que ie n'en diray mot à personne.

Monsieur. Mon petit papa, c'est qu'on dit que Monsieur le Cardinal a fait tant de mal aux Parisiens, qu'ils ne veulent plus qu'il y retourne.

Le Roy. Mais on m'auoit dit que c'estoit à moy que les Parisiens veulent mal.

Monsieur. Non, non, mon petit papa, ne les croyés pas, ce sont des causeurs, qui vous ont dit cela, les
Parisienſ

Parisiens vous aiment de tout leur cœur ; mais ils veulent vn mal enragé à monsieur le Cardinal, & voudroient tous l'egorger s'ils pouuoient.

Le Roy. Mais pourquoy est-ce donc que ma bonne maman le veut garder, puis que tout le monde luy veut mal, pour moy ie luy veus bien mal aussi?

Monsieur. Et moy aussi, ie voudrois bien qu'il fut bien loin.

Le Roy. Ie m'estonne pourquoy on le garde.

Monsieur. Mon petit papa, c'est que tout le monde croit qu'il a enforcé ma bonne maman.

Le Roy. Comment enforcé.

Monsieur. Qu'il luy a donné des caracteres, afin qu'il soit bien puissant.

Le Roy. A mon oncle le Duc d'Orleans, luy en a-t'il donné aussi?

Monsieur. On dit qu'ouy.

Le Roy. Et à mon cousin le Prince de Condé?

Monsieur. On dit aussi qu'il luy en a donné.

Le Roy. Iesus! il est donc bien meschant.

Monsieur. Vrayment ouy, il est bien meschant, il est si meschant qu'on dit qu'il a vn diable familier.

Le Roy. O bon Dieu! n'approchons donc plus de luy.

Monsieur. Pleut à Dieu.

Le Roy. Il me fera bien plaisir de ne me point aborder, car ie l'ayme encore moins que ie faisois.
Monsieur. mon petit papa, il ne faut pas dire cela, car s'il sçauoit que vous & moy nous ne l'aimons pas, il nous ensorceleroit pour se faire aimer.

Le Roy. Ie luy veux faire bonne mine, mais ie luy feray mauuais ieu, ou ie ne pourray.

Monsieur. Vous ferez bien, mon petit papa, pour moy ie luy en veux faire autant.

Le Roy. mais d'où vient que nous ne retournons pas à Paris.

Monsieur. C'est que ma bonne maman a fait assieger Paris.

Le Roy. Elle l'a fait assieger.

Monsieur. Ouy vrayment.

Le Roy. Et que croit-elle donc de faire,

Monsieur. Elle croit les faire mourir de faim.

Le Roy. mais que dit-on de ce siege?

Monsieur. On dit que ma bonne maman n'y fera que sang & eau.

Le Roy. Comment,

Monsieur. On dit qu'elle n'y fera rien.

Le Roy. Tant mieux, i'en feray bien aise, comment n'en fera-t'elle rien.

Monsieur. C'est qu'on dit, qu'ils sont plus forts qu'elle.

Le Roy. mais leurs gens ne sont-ils pas pour moy?
monsieur. Ouy vraiment ils sont pour vous.

Le Roy mais les parisiens ont-ils bien du pain, car j'entends quelquefois dire qu'ils meurent de faim,

Monsieur. Vraiment, vraiment s'ils ont du pain, ils ont du pain & toutes sortes de viandes pour six mois.

Le Roy. Et que ferons nous donc pendant ce temps-la, demeurerons nous toujours icy?

monsieur. Je n'en sçay rien, il me fâcherait bien.

Le Roy. mais qu'en dit-on,

monsieur. On espere que le bon Dieu fera desenforcler ma bonne maman, qu'elle fera leuer le siege, & que nous retournerons à Paris.

Le Roy. mais ramenerons-nous M. le Cardinal?

monsieur. O que n'anny, car si nous retournons à Paris, il faudra bien qu'il fasse gile, car les Parisiens nel'y souffriroient jamais entrer, ils le tueroient.

Le Roy. mais ma bonne maman, les Parisiens l'aiment-ils bien?

monsieur. Certes ouy, mon petit papa, car ils ont toujours conneu qu'elle estoit bien deuote, bien bonne & bien-heureuse, il n'y a que ce meschant homme à qui ils veulent mal.

Le Roy. Je voudrois donc bien que quelqu'un dit
à ma bonne maman, qu'elle le chassât, elle ne me
croiroit pas si ie luy disois.

monsieur. Ny moy aussi, & ie n'ay pas garde de luy
dire, mais Sire, j'ay peur que nous ayons trop de-
meuré ensemble & qu'on ne se doute de quelque
chose.

Le Roy. I'en ay peur aussi.

monsieur. A Dieu donc, mon petit papa, si vous
ne dittes pas ce que ie vous ay dit, ie vous diray
vne autrefois tout ce qui se passe.

Le Roy. S'il ne se dit que par moy, sçaches qu'il
ne se sçaura pas, ie suis aussi secret que toy, & ie
sçay bien me ressouvenir de tout, sans rien dire,
A Dieu.